



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

Tir Yimyim

tiryimyim@aolima

tir yimyim

TAPAK 10



Mapa manguba tebilemstü ya Modi sorkar ajanga lir

Paralympics medal ana angur India tsür rongnung Avani mezüng kümogo

VOL. XVIII NO. 322 (ADOK 322) DIMAPUR

KÜPTOKNÜ (SATURDAY)

RONGJUI (SEPTEMBER) 04, 2021

₹ 5.00

## Ao Senden 21 buba yimkong mungdang takok ngua kaogo



**Mokokchung, 03 Sept (TYO):** Ao Senden 21 buba yimkong mungdang Sept 3 nü yangi Mokokchung town hall nung takok ngua mungdang. Iba mungdang ya taküm küm April ita nungto agitsüba sentong ajak renemer liasü, aji saka, iba mapang covid-19 wara tesashi mapang ka liasü. Sorkari latetsüba inyakim (SOP) ama shitak benshia iba mungdang agia liasü.

Tanü iba sentong nung tayongzükba o jembir Rural Development Minister, Metsübo Jamiri jembidang, Ao Senden ya Aor tebhong langer lungjema alitsü nükjiding yur tentetba lir, iba ajanga tanü Aor lungjemer

aser ibai Aor akhümpok lir, anungji, asenoki iba akhümketji mesamadaktsüsüla, ta ashi.

Tanü Aor iba jenjang tongtetba ya taoba mapang asen tsüraburtemi tarutsü atema taküm tenlaa inyakba ajanga lir, iyongji tanü parnok maongka nung asenok anisüngzük, aji oda, item otsütemji asenoki mamatoktsüla, ta pai shisem.

Aor bendanglen mapa inyaker aikati pei mapa nung sodi ngur külen pei limai meyipa marur, parnok ket nungji rongsen den shisatsü bena lir. Anungji, pei lima menungraa meyipa arunütsüsa asenoki koba tashi inyaker, ta paisa asüngdanga ashi.

(Maneni tapak 9 nung...)

## Sep 13 nungi Foothill Road atema lungkak aittsü

**Dimapur, September 3, 2021 (TYO):** September 3, 2021 nü Dimapur nung Foothill Road atema senden ka ayonga menogo.

Iba senden nung Nagaland Foothill Road Coordination Committee (NFHRCC), Dimapur nung amenoka aliba Kin Hohotem, kaketshir & lanur tentettem aser Central Nagaland Students Association (CNSA) tanishirtem aden.

Nagaland state sorkari September 1, 2021 nü NFHRCC dangi temepishia shidi ka züluba indang senden nung benoka lemsatp aser idangji sorkar nem

September 12, 2021 tashi mapang agütsüsü telemtetba agi.

Iba mapang tsüingda sorkari nungi telanzüba tajung mengura September 13, 2021 nungi mapang telatet makai lungkak aittsü ta tanü senden nung adenertemi bangjemtepogo.

Senden nungsa September 7, 2021 nü Foothills road tribal organisations, students' bodies aser Youth organizations den senden ka amentsü telemtetba agi.

Sendenji nikongdang 3:00 ako nung NFHRCC base office, Kher Mahal, Dimapur nung amentsü aser idangji mapang telatet makai lungkak aittsü indang jembitsü.

## Dimapur nung Sep 16 tashi lockdown alitsü

**Dimapur, September 3, 2021 (TYO):** Nagaland kübok Dimapur district nung September 16, 2021 tashi lockdown alitsü ta Deputy Commissioner Rajesh Soundararajan, IAS-i metetdaksüogo.

Dimapur district nung aonung 8:00 ako nungi anepdang 4:00 ako tashi 'night curfew' maneni alitsü.

Tang lapokba ama essential goods & commodities ayokba

dokantem aser LPG, E-commerce services amala anepdang 6:00 ako nungi nikongdang 6:00 ako tashi lapoktsü, ta Dimapur DC-i ashi.

Tanga dokantem aser New Market, Hongkong Market o Hazi Park nung aliba dokan ajak Hombar, Mongulbar, Brihostibar, Hokolbar aser Honibar anogotem anepdang 6:00 ako nungi nikongdang 6:00 ako tashi lapoktsü melar, ta paisa metetdaksü.

(Maneni tapak 9 nung...)

## COVID-19 Nagaland: 56 taneptsü angu, 40 dak putet & 2 asü

**Kohima, September 3, 2021 (TYO):** Tanü agi anogo asembuba atongtepa Nagaland nung COVID-19 puteter dang nungibo taneptsü angur teimba liasü. Hokolbar nisung 56 taneptsü angu aser 40 dak putet.

"Tesüiba ghonda 24 tsüingda nisung 40 dak COVID-19 aliba putetogo. Parnokji Dimapur nung 15, Kohima nung 11, Mokokchung o Phek nung asemsem (3), Longleng, Peren o Tuensang nung anana (2) aser Kiphire o Wokha nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang tsüingda COVID-19 puteta alir nisung 56 taneptsü angu. Parnokji Dimapur o Kohima nung tertrokrok (16), Mokokchung nung 12, Longleng o Tuensang nung pezüzü (4), Wokha nung 2 aser Peren o Phek nung kaka (1) lir" ta pai metetdaksü.

"Nagaland nung COVID-19 nungi taneptsü angur nisung 27,960 kümogo aser ibaji 92.44% lir. Tang nisung 577 anepaludar" ta Dr Kikon-isa ashi.

Hokolbarnü Dimapur aser Kohima nung COVID-19 puteta alir nisung kaka asüba züingsema tasür ajak agi 626 kümogo, ta paisa shisem.

"Brihostibar tashi nung

nisung 659,291 nem COVID-19 vaccine indang dose 869,916 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,851, healthcare workers 15,992, arishi küm 45 ser temapur 193,248 aser arishi küm 18 nungi 44 tsüingda alir 389,200 lir" ta paisa ashi.

"Vaccine agirtem rongnungi nisung 210,625-i dose anaprong agiogo. Parnokji frontline workers 44,498, healthcare workers 12,948, arishi küm 45 ser temapur 115,586 aser arishi küm 18 nungi 44 tsüingda alir 37,593 lir" ta Dr Thurr-isa metetdaksü.

## Rising People's Party-i Foothill Road atema tenla bendener

**Dimapur, September 3, 2021 (TYO):** Rising People's Party (RPP)-i Hokolbarnü "Trans-Nagaland Expressway" ta ajaba Foothill road renema yanglutsü atema 'crowd funding campaign' tenzükogo.

Iba sentong ya tanü Hotel Acacia nung tenzük aser RPP-i ashiba agi September 3 nungi tenzük anogo 100 campaign agidang Rs. 10 crore tashi bendentsü nükjiding lir.

"Iba campaign nung bendentetba sen ajungaji Foothill road project nung dang amshitsü saka shir ket nung agütsüsü'ar ano telemtetba magi. Onoki luden mesüra telok kar madak inyaktsü merangerba masü saka foothill road project tembanga inyaktsü asoshi yariteper" ta RPP-i ashi.

RPP-i ayongba crowd

funding campaign ya MILAAP-i dang indangindanga acha-ayangtsü. MILAAP ya India nung most trusted crowd funding platform lir.

Sen tenlanürtemi MILAAP website "Milaap.org" nung mesüra milaap.org/fundraisers/support-foothill-road nung tenlatsü akok aser ashishitep malitsü atema sen tenlartem indang tenüng sayutsü.

Iba dak sendakba osang talila metetnürtem WhatsApp numbers #7005060426 #9774809276 mesüra risingyouth@gmail.com ajanga tongteprateptsü akok.

Kilometer 396 talang foothill road project ya Nagaland sorkari 1974 küm apitetba liasü.

2013 küm Kin Hoho 11 nungi teshimtet nübotem

densemer Nagaland Foot Hill Road Co-ordination Committee (NFHRCC) tentet aser parnoki state sorkar dang iba lenmang tembanga yanglutsü atema mepishia liasü.

Kija, lokti tentet aser arogotemi iba lenmang ya kanga tongtipang ta angateta yaritepa aru saka August 2016 nung senotsü peria maliba ajanga mapa anentsüsa aküm. NFHRCC report nung ashiba agi earth-cutting mapa 90% inyakogo ta ashir. Anungji tang anünga aliba mapatem rongnung earth-cutting 10% aser Doyang ayong temdanga apu renema yanglutsüba lir.

Iba gari lenmang maliba ajanga Nagaland nung alirtemi Assam adena senzütsüsa akümer aser iba ajanga khuret aser tetsükdaksü jenti ajurur.

## 2030 küm tashi nung Nagaland nung tzü tajemtsü peria angutsü

**Kohima, September 3, 2021 (TYO):** Nagaland sorkari 2030 küm tashi nung state nung alir ajak nem tzü tajemtsü tajung agütsüsü.

Nagaland Sustainable Development Goals (SDG) Vision 2030 nung alizüing 17 ayuba nung Clean water & sanitation ya ka lir.

2030 küm tashi nung state sorkari tzü tajemtsü agütsüba 100% atongtsü Water Users Association (WUAs) kübok Irrigated Command Area 70% atongtsü alizüing yua lir.

Sorkarisa tzü aliba tesemtem ajungkettsü aser kümzuka ayutsü alizüing lir.

Nagaland kübok Public Health Engineering Department (PHED)-i tang

aliba water supply system tajungba akümtsü aser tzü tajung agütsüba den solid & liquid waste timi endoktsü aser environmental hygiene alitsü atema meranga inyaka arur, ta Vision Document nung shia lir.

PHED-i Water and Sanitation Support Organisation (WSSO) kübok nübotem nem safe water & sanitation indang osang sangokja arur.

Nagaland nung ali kibur inyakim balala asübayong sorkari drinking water supply scheme tem inyakdang tetsükdaksü ajurur, ta document nungsa shia lir.

Tzü tajemtsü peria manguba khuret ajema küm daksütsü atema Jal Shakti Ministry

indang National Water Conservation Plan aser MGNREGA scheme kübok rainwater harvesting, water conservation aser catchment area conservation maparen tuluba inyaktsü akok, ta Vision Document nungsa shia lir.

Tarutsü nung kiojen yangluba mapa atema district administration temi rooftop rainwater harvesting compulsory sädaksütsü akok, ta document nung shia lir. Department of Water Resources, Nagaland-ia aluyimtsü atema irrigation indang water tariff, crop water management atema volumetric basis aser predetermine rotation irrigation system tenzüktsü.

# Aor Tarnunger Otsü kaket ka saya



Tanü Rogonü Aor Tarnunger Otsü kaket sayaba mapang kaket zülur, Wb. N.Talitemjen Jamir (Mena alisangji) den kaket sayatsür Rev.Dr.Temjen Ozüküm ( achijilen nungi anabuba) aser kinungertem noksa nung angur. ( Dipuphar, Sept.03, 2021.).

**Dimapur, Sept.03 (TYO):** Kenschir Oshir, kaket zülur aser lipok otsü ashir, tsürabur Wb.N.Talitemjen Jamiri züluba "Aor Tarnunger Otsü" kaket ka tanü rogonü (Hokolbar) yangi Dimapur nung par jabaso Dr.T.Lima Jamir'er kidang Ao Baptist Arogo Indisen sannüker Rev.Dr.Temjen Ozükümi sarasadema sayatsüogo.

Iba Aor Tarnunger Otsü kaket ya, Wb.N.Talitemjen Ao Nagaland Civil Service nung alidang, 1961 küm mezüing adok aser iba kasa otsü kaket tajungba nung bendenloka yanglushir tang ya ano tasensa adoker.

Iba kaket ya tamalenbo kaketreju nung tazüingtsü kaket küma amshia liasü aser tanüa lanu asensortemi iba ama otsü

kaket ya sapua züingdaksünüba agi iba kaket ya ano khen reprangshir tajungtiba küma adokogo ta tanü iba sentong nung jembidang Dr.T.Lima Jamiri metetdaksü.

Iba kaket nung Tarnunger otsü 38 lir aser item rongnung Sarilungli pa atura mapang ajak süitema mapa meinyaki chiyongba lima ka bushia senzüba, Tsüngen Pungmang aser Ozü kin Sobutsü alemba otsütem lir.

"Otsü meteter tsürabur aika alima nungi pilar, joko otsü ashir mali akümba putu ka nung, lenir N.Talitemjen Jamiri nüken belem arema lanu putu asoshi iba Tarnunger otsü , koba Ao kini jembia aru, ibaji kaket küma zülutsü nung kanga pelar.

Tarnunger otsütem ya amadokra, asen Aor songjen senti rongsen aser tarutsü senmang kimong ka tesama akümer," ta iba kaket O Semlok nung Laishir mongin Wati Longghar-i shisema lir.

Tanü iba sentong nung adenertem rongnung ABAM nung taoba Executive Secretary, Rev. O.Alem aser Tir Yimiyim yimozülur, Wb.K.Temjen Jamir nungertemi kaket adoker nem tenüingsang agüja jembia liasü.

Iba kaket ya kaket ayokdak sen jenjang senpak 200 agi angutsü aser taginürtemi mobile phone number 7005527600 aser 9362561895 ajanga tongteprateptsü akoktsü.

# New India @75 atema Kohima District Level Committee senden amen

**Dimapur, Rongjui/Sept. 03 (TYO):** New India @75 maparen inyaksü atema shimteta aliba Kohima District Level Committee pur senden ka Deputy Commissioner indang Conference Hall, Kohima nung September 3, 2021 nü mena liasü. Iba senden ya ADC Kohima, N. Bhavani Sri IAS mendenpuba sür agia liasü.

Bhavani-i senden nung district level committee indang teinyatsü shilem rateta ashi aser district level nung inyaksü tongtipang sentong ana lir - omen asem (HIV, TB aser Blood Donation) nung ajemdaker jangjateta aliba school aser college tem nung awareness sentong agitsü aser jangjateta aliba school aser college tem den lungjemer tetoktepba maparen balala alitsü - ta ashi.

Anungji iba senden nung

züngsem kar shimteta awareness drive atema sub-committee shima liasü aser ano maparen balala asameyanga tendangtsü aser result sangdongtsü atema sub-committee ka shimteta liasü.

ADC ajangasa züngsem ajunga dang district nung iba sentong takok ngua inyaksü asoshi maparen balala lungjemer inyaksü ajungshia liasü.

District Program Officer, Sentimongla Tzudir-ia iba senden nung Nagaland State AIDS Control Society ajanga National AIDS Control Organisation (NACO) kübok inyaksüba New India @75 sentongtem lemsatepa liasü.

NACO ajanga shilem asem lemar HIV, TB aser Blood Donation nung awareness sentong asem agitsü, ta lai ashi.

Awareness campaign ya tembangba sülen item omen

asem nung ajemdaker shilem pezü nung online tetoktepba alitsü aser yangji shilem shia takok angur nem senpet sen den kuli kaket agütsütsü.

Iba campaign nung target group ya Class 9 aser 11 nung azüingba kaketshirtem aser College/Institution nung Red Ribbon Club züngsemtem alitsü, ta lai ashi.

Kohima district atema shilem asemprong sentong kasa dang alitsü saka State Level Committee nungi temelaba agütsüba sülen item sentongtem inyakyonga aotsü mapang telemsa metetdaksütsü, ta DPO ajangasa ashi.

District nung HIV, TB aser Blood Donation nung awareness agütsütsü asoshi school trok aser college trok shimtetogo aser yangji iba maparen ya anogo ishika tsüingta agitsü, ta ashi.



Nüburtem timtemba ngua All Ward Union Mokochung Town ketdangpurtemi Dr. Imkongliaba Memorial District Hospital (IMDH), Mokochung semdangba mapang IMDH MS Dr. Limatula Aier densema noksa nung angur. IMDH nung mozüki tasen asütsü atema tejenba taktangtem tuluka bentoker lir aser ki tasenbaji mapang talangka yanglu metenzüker. Iba osangji angashia AWUMT-i IMDH ketdangsürtem ajurutepa iba dak sentakba nung khuret lemsatepa liasü. Mokochung, 3rd September, 2021.

# Kohima nung lockdown atsülangshir: Deputy Commissioner

**Dimapur, Rongjui/Sept. 03 (TYO):** Home Department, NSDMA Government of Nagaland ajanga September 2, 2021 nü sangdongba den bendenloksema Kohima district nunga COVID-19 tashidak wara nungi nüburtem jembua alitsü mechi Deputy Commissioner & Chairman, District Task Force Kohima, Gregory Thejawelie, NCS ajanga sangdong ka nung totuyuba kar agütsüogo.

Sangdong ajanga ashiba agi, Deputy Commissioner ajanga

August 18, 2021 nü metetdaksüba ama tang aliba lock down meratem aser inyaksangshi balala atema talenba sala alibatem maneni September 16, 2021 nü tashi Kohima district nung amshitsü.

Item totuyuba nung mapettsüsa inyaksangshi kar danga lira, itemji Indian Penal Code indang Section 188 aser Disaster Management Act, 2005 indang ozüing tapet agi merenshitsu, ta sangdong ajanga ashi.

# Polling stations indang draft list renema lir: DEO Kiphire

**Dimapur, Rongjui/Sept. 03 (TYO):** Returning Officer 2019 atema Handbook para 2, 8 aser 4 nung mela aliba ama Kiphire District kübok 59 Seyochung-Sitimi A/C aser 60 Pungro-Kiphire A/C indang polling station draft list renema lir, ta Deputy Commissioner & District Election Officer, Kiphire, TWati Aier, NCS ajanga sangdong ka nung metetdaksü.

Nüburtemi reprangtsü

asoshi iba draft of polling stations ya Deputy Commissioner & District Election officer, Kiphire indang office nung angutsü.

Polling station indang draft list nung tai aputsü mesüra temotongshitsu kar danga lira, nüburtemi September 10, 2021 tashinung District Election Officer, Kiphire nem tezüluba nung agütsütsüla, ta sangdong ajanga ashi.

# Aor Senmang indang film ka sayaogo



Ao oshi nung yangluba film ka tenüing agi 'Senmang' tanü Mokochung nung Deputy Commisisoner, Wb.Limawabang Jamir (abelen)-i sayatsüba noksa nung angur. ( Mkg.Sept. 03, 2021).

**Mkg. Sept. 03 (TYO) :** Tanü Rogonü yangi Mokochung nung Deputy Commissioner, Wb.Limawabang Jamiri film ka tenüing agi "Senmang" sayatsüogo.

Iba senmang film ya Watsü Mungdang, Saksi One Stop Centre Mokochung aser Mokochung nungertem külemi longjemer inyakba mapa ka lir. Iba film adokba

nükjidong ya Aor sobaliba nung senmang amangtepbaren nung akhi tetsü tebou mapang nungi amanga aruba ali senmang aser tanü asüing peisasa ajanzükttetba ali senmang na tsüingda tangatetba ka agütsünüa yangluba lir.

Iba ya Wb.Bendang Walling lenisüba nung Ao oshi nung yangluba sobaliba film ka lir. Tereprangnertemi iba film ya YouTube Channel 'Hill Theatre' nung reprangtetsü.

# NMA-i Manoj Anand anema ken o benok

**Dimapur, Rongjui/Sept. 03 (TYO):** Naga Mothers' Association ya NSCN IM indang frontal organization ka lir, ta The Asian Age aser Deccan Chronicle indang Special Correspondent, Manoj Anand-i sangdongba ya khukhua aitsür, koba Deccan Chronicle, The Asian Age, Facebook aser Twitter nung ayimjema prokshio, ta Naga Mothers' Association (NMA) ajanga sangdong ka nung ashi.

Iba ama tapi agi tai tongloktsüba ya tamendak dak maka aser tim masü aser Naga tsür tenüing menüktsütsü, mezüingmeshitsu aser jashidaksütsü atema amshiba

lir, ta ashi. Anungji Naga Mothers' Association ajanga SC/ST Prevention of Atrocities Act kübok FIR ka Director General of Police, Nagaland, Kohima nung Manoj Anand anema benokogo, ta ashi.

Maneni osangbener Manoj Anand dang yimjak nung tatok meshitsu aser pai züluba article ya social media, Facebook aser Twitter nungi anogo 15 tsüingta agientsü atema totuyuba ka agütsüogo, aji mesüra NMA maksütsüba atema tapet mera agitsü, ta Naga Mothers' Association indang Media Cell sangdong ajanga ashi.

## LGBI airport tenung melentsü sentong kecha mali: Assam CM



**Guwahati, September 3, 2021 (Agencies):** Guwahati nung aliba airport tenung melentsü sentong mali ta Assam chief minister Himanta Biswa Sarma-i ashi. Adani group ktdangsurtem den senden ka amenba sülen CM Sarma-i iba osang metetdaksü. "Guwahati airport tenung teti Lokapriya Gopinath Bordoloi International Airport

asütsü" ta Assam CM Himanta Biswa Sarma-i ashi. Adani group-ia Guwahati, Assam nung airport tenung melenshitsu tebilemba kecha mali ta shiogo, ta paisa shisem. "Senden amendang Guwahati Airport tenung memelenshi ta ni shiogo. Lokapriya Gopinath Bordoloi Airport-ia ibaji nangzükogo aser India nung airport

tajungtiba rongnung ka kümdaktsütsü ashi" ta Assam chief minister-isa metetdaksü. Guwahati airport tenung melenshitsu akok ta nisungtem bilema liasü. Nisung aikati Guwahati nung Lokapriya Gopinath Bordoloi International Airport nungi Adani Guwahati Airport ta tenung melentsü akok ta tsüba liasü.

## Mizoram nung Myanmar refugee tanurtem züngdaktsütsü

**Aizawl, September 3, 2021 (Agencies):** Mizoram sorkari Myanmar refugee nunger tanurtem school nung admission agitsü temelaba agütsüogo. Mizoram nung Department of school education director-i district education officers aser sub-divisional education officers ajak dangi Myanmar nungi India- arua jenokba

refugee tanurtem school züngdaktsütsü atema tetuyuba agütsü. August 31 nü Mizoram school education department-i iba shidi ya agüja liasü. "Right of Children to Free and Compulsory Education Act, 2009 (RTE Act-2009) ajanga arishi küm 6 nungi 14 tsüngda tanurtem school azüngtsü

temeten agütsür" ta director-i shidi nung ashi. "Iba jagi nenok tesemtem nung migrant/refugee tanurtem school azüngtsü atema admission asütsü mepishir" ta paisa ashi. Myanmar nunger meyrjang aikati Mizoram nung international border adena India nung arua jenoka lir.

## Guwahati nung floating restaurant tzü nung meküpok

**Guwahati, September 3, 2021 (Agencies):** Guwahati kübok fancy Bazaar nung nungtu floating restaurant-South Coast Restaurant nung Brahmaputra ayong meküpokogo. Tesüiba anogo ana tsüngda Brahmaputra ayong nung tzü teimba akümba sülen boat restaurant meküpok. Rong nung tapok kar aliba ajanga ayong nung meküpok asütsü akok ta Inland Water

Transport Department ktdangsurtemi ashi. Taoba küm ana tashi floating restaurant ya shibanga liasü ta osang angazüker. Inland Water Transport Department-i rong agitettsü atema mapa inyakdar. Iba restaurant ya shishilembar Sunit Beria-i inland water transport department nungi lease nung lapokba liasü. Guwahati nung nungtu floating restaurant tem rongnung

floating restaurant ya ka liasü aser anogoshia nisungtemi semdanga liasü.

## Assam CM-i bus taa matutsü tetuyuba agütsü

**Guwahati, September 3, 2021 (Agencies):** Assam nung inter-district bus taa matutsüla ta Assam chief minister Himanta Biswa Sarma-i tanü metetdaksüogo. Assam nung bus owners' associations-i taa atutsü atema lungkak aita takhangba agütsür.

## Taoba Tripura Assembly Speaker-i BJP vice president inyaksü


**Agartala, September 3, 2021 (Agencies):** Brihostibarnü Tripura Assembly Speaker Rebat Mohan Das-i mapa nungi anenogo aser iba sülen mapang tatsüka dang lir pa state BJP unit nung vice president inyaksü shim.

"Bharatiya Janata Party, Tripura Pradesh nung Vice-President inyaksü atema Rebat Mohan Das shimer. Tanga tetuyuba magütsü tashi pai iba mapa inyaka aotsü" ta Tripura BJP President Manik Saha-i sangdong ka nung metetdaksü. Nija tebilemstü kar aliba ajanga Speaker Das-i mapa nungi anener ta yashi

ktdangsur kati ashi. "Assembly Speaker Das-i Deputy Speaker Biswa Bandhu Sen ket nung mapa nungi anenba shidi agütsü" ta Tripura Assembly secretary Bishnu Pada Karmakar-ia ashi.

Das ya taoba CPI-M lennir ka liasü aser 2016 nung BJP nung aden. 2018 Tripura Assembly elections nung pai BJP ticket nungi takok ngua liasü. Tripura nung BJP MLA aser lennir telok kati Tripura chief minister Biplab Kr Deb anema noktakba mapang ka nung Deb-i State Cabinet nung nisung tasen asem shimokogo.

## Manipur sorkari e-ILP tracking system tenzükogo



**Imphal, September 3, 2021 (Agencies):** Manipur sorkari e-ILP (Inner Line Permit) tracking system tenzükogo. Manipur chief minister Biren Singh-i Imphal nung pa indang office nungi iba mapa tenzüktsü. e-ILP tracking system ya Manipur: Jiribam railway station, Jiribam foreigner check post, Mao gate aser Imphal airport nung tenzük.

"State nung Inner Line Permit system tiptema inyaksü atema e-ILP tracking system

tenzük" ta Manipur chief minister Biren Singh-i metetdaksü. "Iba sabang ajanga state-i arurtem ILP mapang tembangyonga tsüngtsü bushitetsü" ta paisa ashi. "Iba sabang ajanga state-i arurtem entry, exit aser tracking mapa shitak inyaka otettsü" ta Manipur Assembly deputy speaker, K Robindro Singh-ia ashi. Manipur nung January 2020 nung Inner Line Permit System tenzük liasü.

### GOVERNMENT OF NAGALAND

### DIRECTORATE OF HIGHER EDUCATION

### NAGALAND: KOHIMA

NO.HED/SCHO-1/2016/

Dated, Kma, the 2nd Sep

### INFORMATION ON POST MATRIC SCHOLARSHIP (PMS)

### FOR ST STUDENTS OF NAGALAND

It is hereby informed to all the beneficiaries of *Post Matric Scholarship (PMS) for ST students of Nagaland* that the Scheme Implementing Agency has started disbursing the 2<sup>nd</sup> & Final installment of PMS for the year 2020-21 since 23<sup>rd</sup> Aug. 2021 and accordingly uploaded the Beneficiary and the Rejected list of PMS in the Directorate's website i.e. [highereducation.nagaland.gov.in](http://highereducation.nagaland.gov.in). Students whose names are in the beneficiary list and yet to receive their Scholarships can email/whatsapp his/her Bank Account Details along with the Application ID and Sl.No. in the beneficiary list to the contact/email given below.

Contact No. 9863379247

Email: [query.hescholarship@gmail.com](mailto:query.hescholarship@gmail.com)

Sd/-  
(Dr. APENI LOTHIA)  
DIRECTOR  
HIGHER EDUCATION  
NAGALAND: KOHIMA.



Hokolbarnü Industrial Training Institutes (ITIs) balala nungi kaketshirtemi Dibrugarh nung lungkak aitba sentong ka agiba angur. Dibrugarh nung All Assam Students' Union (AASU) office jakdang State Council for Vocational Training (SCVT) kübok 2019-20 final year batches ITI kaketshirtemi ghonda 12 lungkak aita liasü. COVID-19 wara ajanga ITI indang final year tatidang athiba anema parnoki lungkak ait. (Dibrugarh, September 3)



## TIR YIMYIM YIMOBILEM (EDITORIAL)

DIMAPUR KÜPTOKNÜ RONGJUI (SEPTEMBER) 04, 2021

### Nübor saru

**A**tangji tangalenbo nübor temi pei inyakba mapatem nung ajangzük tetba nungi government-i saru tapu ka (income tax) sarur aser iba sen nung jagi ano meyiper nübor temi asoshi terenlok mapa inyaker. Ibaji asenok arogo nung asenoki ajangzük tetba rongsen nungi noklang nung ter shilem arogo nem agütsüba nungi ano arogoi arogo nungertem asoshi nungdak mapa inyaktsüba amai lir. Ajisüaka, Nagaland nungbo nübor temi ajangzük tetba nungi government-i kecha mesarur, anungji asenokbo government dang nungi angutsü imlar dang ashi, asenoki government nem agütsütsüba khuret kecha mali, ayongayonger government meyong agizüka magir takoksa ta dang bilema pei akok asaa rongsen bendener. Ajisüaka, kodang asenoki pei mapa nung ajangzük tetba nungi government-i shilem ka saruba nükjidongji angatetdir, iba jagi tangar limatem nung terenlok mapa takok ngua inyakba indang angatetsü. Pei aaba mesüra ajangzük tetba nungi government-i shilem ka saruba nükjidongji government asoshi sen sarurba masü saka shitakba nükjidongjibo ochimashi mapa nokdangtsü asoshi inyakba sentong ka lir. Tatishitsü agi, nisung kati pei mapa nungi ajangzük tetba nungi government sarubo sen lakh ter jenjang dang agütsü saka pai par kibo sen crore ter jenjang yanglura mesüra gari ka sen lakh metsü-semer jenjang alia amshira, iba jagi pai ochimashi mapa inyakba sayur, anungji asen lima nung pei sünütsü asür dang ashi, tanga lima nungbo government nung ochimashi mapatem mita bushirtemi iba nisungba dangji "na government nem sarubo sen lakh ter jenjang dang agütsü, saka sen crore aika jenjang nür ki yangluba aser sen lakh metsü-semer jenjang gari aliba sen ya kong nungi aru?" ta asüngdangya tenzüksü aser shitakba ochimashiba lenmangtem nungi rongsen bendenba putetra tepuokdaki yoktsü aser senchia achitsü. Tanü Nagaland nung iba ama sarua mesarur aser anümeraa pua government office-tem nung pen amer ayuba agi manger sangwa nung takar kuma sayuyonga, lokti sentong ka nung senotsü tenla teraka imlaa tongti tesemdang jaoktsüba dak alaka, tebushir maliba limaji asen lima lir. Iba ama lima ka nung küm 40 nunga nübor temi asoshi kanga tongtibang lenmang "Foothill Road" tatsüka merenmet kangshiba angur. Tang alituba mapa renema akaba aser Doyang apu yanglu tenzük bajia, nübor temi adenshir Nagaland Foothill Road Co-Ordination Committee (NFHRCC) tentetba sülen parnoki anibelem aser nungsenbangsen arema longkak aita rongshiba agi inyak tenzük dang ashi, tanga ano tenüng dang" foothill road' ashi arem lila. Iba lenmang ya Naga nungter inti asoshi kanga tongtibang asüba agi, Ao Baptist Arogotemibo temulunger tenla dena sarua state government nem agütsüogo. Iba senjia shitak kasa mapa asoshi government senpongi ai asü maiar, sen enoktsüba government challan-ji bushia ajungshiteptsüla. Iba kasa lenmang ya yaktsa renemdaktsünüba agi, ano NFHRCC purtemi longkak aittsü lia anogo ishika atema government-i songtema lir. Ano, kasa lenmang asoshisa tang Nagaland nung tasen tentetba yimten telok, Rising People's Party (RPP) nung lanurtemi online nung temulunger saru sarutsü tenzük bajia sentong tajung ka rajema inyakdagi ta bilemer. RPP teloki foothill road atema temulunger sen sarubaji senpak ka tashi agitsü ta sangdonga lir aser iba senji tetenlanertemi parnoki lapokba website Milaap.org lapoker agütsütetsü. Ibai tang Nagaland government asoshi tayongzükba tasen aser tuluka kümogo. Joko, government-i meinyaktsüra, asenoki inyaknü meinyaknü ta masü, asenoksa akoksar asünungji foothill Road dang masü saka tanga lenmangtema dena nübor temi saru agi yanglutsüsa akümstsü. Asenokibo lenmang meyangu ser lenmang yanglutsüba sen agizüka chitsüyonga tarem, lenmang mashimashi yanglur sen agizüka achiyonga kecha masü, lenmang yanglutsüba senbo ajak chiadoker asenok arem nema, lishi mélanga aser auyi ponga, tarok-tapa nung kor nung senzür ama temang aser gari ajak raksaa jokshishia senzüyonga tepelaang pelar. Item aman nübor temi shibaibo akhümstsüba züngshitsü? Joko, asenoka asenok shilem meteta agütsütsü aser bushitsü mapang tongogo.

## OLEMSABANG

### Asenok ya Tsüngrem lar asü Tsüngrem chir?

T. Meren Paul, Kohima

Asen Ao lima nung rivival milak jangruba tanaben buba 1966 küm Changtongya Town Arogo nungi adok. Rev. M.I. Luin Changtongya town Baptist Arogo nung Pastor inyakba mapang pa den damang maba nung teyariteper tajung Lt. R. L. Alemba Jamir, Noklang Aonok aser Lt. I. Masa, parnok Temeshi Tanela agi semdangba tejangja meteta revival tulu animeso. 1966 küm-ji ni Shillong nung zünga aliba 1967 kümbo Changtongya Govt. High School nung Class X nung arua azüng aser taküm nung mezüng laishiba azüngtsü tenzük. Ao Temeshi Laishiba London nung menüngdar tabo angazük saka ano asen lima-i peria donga maru asü anungji Madras nungi VPP ajanga English Bible (KJV) alia azüngtsü tenzük. English junga mashi saka mangatetyonga angateter amai English KJV Bible 1967 nungi tenzüka azüngba tanü tashi KJV azünger. Nia NIV Bible-ji English tajungba ta bilemer küm eshika amshi saka kodang ni Maui, Hawaii US, Haggai Institute nung Advance Christian Leadership Training nung dena liasü, Resource persons dem-i NIV nung medokmeperi aser tai aika aliba indang ashi, iba küm 2002 nungi ni NIV aser tanga laishiba medemdanga azüngtsü tenzük.

Mezüng züluba laishiba lbri aser Greek oshi nung koma zülua aliar ni edem oshi mashi anungji ni memetet saka English laishiba mezüngben meyipzükba aser tawa tanü meyipzükba medemdang nung meputep aika angur. Wycliffe Bible, Geneva Bible, KJV, Mathew Henry Bible nung meyipzükba aika NIV, ESV, NLT den meputeper. Ano Amplified Bible aser Good News Bible yabo kangasa naloknara aser mashileni anitsü temela aser medemdangtsü adema azüngba dak alaka pa kijabo mazüngtsüla.

Aiben tenla kidang devotional sentep nung sayutsüngiba onük nung Tsüngrem lar indang jembiba angashir aser ano Osang kaket nunga Tsüngrem lar indang züluba mapang palala nung angur. Tsüngrem lar ta laishiba nung zülua aliba lai tekong tejangja eshika asen Temeshi Laishiba nung angur aser item lai tekong dem azüngdang kechiba Yehova Tsüngremi alar ayur? Pa asoshi alar nungdak na? ta kü mulung nung aiben shisadanga tasüngdangba ait. Asenok temenen Moijing (Moyotsüng) nütüng liasüba Yisui Khrista senti zü agi alangzük bajia Tsüngrem lar akümstsü asoshi alangzük no? Asen Aor-i aonbo nungi kenteter mimong nung tsükdaktsü ta jembiba medem, nüjiso masü ano alar ang kümshiba angatetdaksür. Asenoki alar ji shir dang ajar jungjunga meteta lir. Asen kotak tebu Tsüngrem kechi mapa atema alar ayutsü nungdaker aka?

Kü tangatetba bo Satan/Moijing (Moyotsüng) ia alar mauyur südi, ajioda pai asen temulungjang nung tamajung inyaktsü shisatsü adokdaksür aser asenok mesüzüker aser asenok kodang tatidang nungji tsükdir asenok pa nütüng akümer. Asenoki temenen tai mapa inyakbaji asen asoshi inyaker saka Moijing asoshi inyaker masü anungji asenokji temenen nung alinung pa nütüng akümer, saka pa lar akümer masü. Satani/Moijingi alar ayuba tetetzü, pai parnok rongnung telemsa adokdaksür aser parnok kodang lemsadir tashi mait akümstsü ta Yisui rateta shia lir, "Mark 3:26 aser Satani pei sasa anema lemsara, pai noktaka melitet, saka tatem tongogo; Luke 11:18 Aser Satan-a pei sasa lemsara ajangla pa yimli koda noktaksü?" Satan/Moijingia alar masü saka pa nütüng nungdaker südi, Laishiba KJV aser NIV nung Moijing lar ta zülua aliasü mali ta online Study Bible KJV aser NIV anaprongla nung bushidang saka nibo kecha nunga zülua aliba mereprangshi.

Asenoki tebu Tsüngrem dang sarasademdang ni nü lar-i mepeshir ta ayimtena sarasademter kechiyong asenok ya Tsüngrem lar ta asenok nem angatetdaksü aser laishiba nunga yamaji dang zülua angur. Laishiba mezüng meyipzükba Geneva Bible, Wycliffe Bible aser King James Version nungbo "alar" (slave) ta zülua mali saka servant/friend ta zülua lir. Ni ashi ama, kü tangatetbabo asenok Tsüngremi Yisui Khrista senti zü agi alangzük bajia alar akümstsü asoshi masü saka pa chir kümdaktsütsü asoshi ta angateter. Küm aika iba olen ya kü mulung nung kanga shisadanga atsütepogo saka laishiba nung pushidangtsü mebilem aser ano kü ket nung laishiba Version tejen rongnung KJV dak alaka tanga mali asü. Yakümyanü laishiba tejen original version karh alia yur junga mezüngdang aliba tang COVID-19 wara lock down sasümanem mapang edem English laishiba version aser Ao Temeshi lai nung alar, kilir aser tenzük tebandang medemdanga bushidangogo.

Asenok joko tawa tanü laishiba version tasen aika adoka lir aser Authorized King James Version, 1611 nung meyipzükba laishiba ya sazüka doktsür azüngtsü English temelaba bushia version tasendem ang sapua azünger aser Ao Temeshi lai nung jia temelensi aika NIV, ESV aser NLT den puteba meyipzükba angur. English Bible nung servant, slave/bondman ta zülua alibaji Ao nung tenzük/kilir aser alar ta meyepzükba angur. English laishiba (Authorized King James Version) nung servant ta lai kaket palala tapu 51 nung tekong 80 tashi nung angur. Lai tekong dem-

Mathew 8: 6, 8, 9, 13;	Mathew 9:35;
Mathew 10:24, 25;	Mathew 12: 18;
Mathew 16:18:26;	Mathew 18: 26, 28, 32;
Mathew 20:27;	Mathew 23: 11
Mathew 24: 45, 46, 48, 50;	Mathew 25:21, 23, 26, 30;
Mathew 26:51;	Mark 8:9;
Mark 9:35;	Mark 10:44;
Mark 12:2, 4;	Mark 14:47;
Luke 1:54,69;	Luke 2:29;
Luke 7: 2, 3, 7, 8, 10;	Luke 12:43, 45, 46, 47;
Luke 14:17, 21, 23;	Luke 16:13;
Luke 17: 7, 9;	Luke 19:17, 22;
Luke 20:10, 11;	Luke 22:50;
John 8:34, 35;	John 12:26;
John 13:16;	John 15:15, 20;
Acts 4:25;	Romans 1:1;
Romans 14:4;	Romans 16:1;
1 Corinthians 7:21;	1 Corinthians 9:19;
1 Corinthians 21, 22;	Galatians 1:10
Galatians 4:1, 7;	Philippians 2:7;
Colossians 4:12;	2 Timothy 2:24;
James 1:1;	Titus 1:1;
Philemon 1: 16;	Hebrew 3:5;
James 1:1;	2 Peter 1:1;
Jude 1:1;	Revelation 1:1;
Revelation, 15:3;	

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Highland Worship team-i 'Prayers To The King' kensep saya



Highland Worship team noksa nung angur.

**September 03, 2021:** United Stated nung Arogo tulu rongnung ka- Church of the Highlands indang worship team Highland Worship teloki ken ter keta aliba 'Prayers To The King' kensep sayaogo; iba kensep nung tekülem agiba videos lir aser ken ajunga jagi teimla osang lemsateper, ta osang ka ajanga lemsatep.

Highland Worship indang video tasentiba "Let It Fall" Christian Post-i sayatsü aser iba ken ya Tsüngrem sentsüwangshi jungkai adoktsü atema sarasademba ken ka lir. Highland Worship team-i

ashiba agi, Prayers To The King kensep ya item ken angar melungjang nung tesünep alitsü, teimla alitsü aser Tsüngrem chichi külemtetba nung yaritsü nükjidong nung adokogo. Iba kensep nung keta aliba kentem angaba ajanga ken angartem sarasadem ajanga Tsüngrem den sendakteptsü imlar, ta parnoki metetdaksü.

Iba kensep nung keta aliba kentem ya Arogo indang Pray First app atema adok aser iba kensep ya angati agütsür.

August 8 nü Church of the Highlands-i anogo 21

sarasademba sentong tenzüka liasü. Item anogo nung parnoki Arogo, züngsemtem aser linük atema sarasadem.

"Tsüngrem den sendakteptsü sarasademtsü nükjidong nung onoki kentem zülur," ta kensep producer, Chris Griffin aser ken mejemer, Lynn DeShazo nati sangdong ka ajanga metetdaksü.

Pastor Chris Hodges-i aniba Church of the Highlands nung multisite campus 23 lir aser hopta shia iba Arogo nung nisung 60,000 dak temai Tsüngrem külemer.

# Malaysia nung Khristantemi missionary ka asüba atema mangyimer



Missionary Peter Bretaudeau (ajichilen) noksa nung angur.

**September 03, 2021:** Malaysia nung France nunger missionary, Peter Bretaudeau asüba atema Arogo kati mangyimer; Malaysia nung mapang talangka tenzüker bendanger missionary tem rongnung Peter densema lir.

Putir, Peter Bretaudeau ya Paris Foreign Missions Society (MEP) nung züngsem ka liasü aser pa arrshi küm 90 lia September 2 nü France nung süogo.

1957 küm pa missionary inyaksü atema Malaysia-i aruba sülen Arogo 10 nung küm 57 tashi tenzüka aru aser 2014 küm nung ang France-i meyipa ao.

Kuala Lumpur Arogo nung chancellor, Michael Chua-i, "Rev. putir, Peter Bretaudeau MEP alima nungi pilaogo,ta

onoki tejashi nung sangdonger," ta metetdaksü.

"Kaula Lumpur nung tongti putir, Reverend Julian Leow aser Arogo nung lenirtemi tang ama mapang ka nung putir Bretaudeau'er kinüngertem den mangyim jashi lemsateper aser longjemer sarasadem ajanga nungiter. Onoki Arogo lenirtem aser züngsemtem danga nenok tekülem nung pa bilemteta sarasademtsü mepishir," ta paisa metetdaksü.

Putir, Bretaudeau ya 1931 küm France nung aliba Le Poiré-sur-Vie yimdak aso aser pa tanur pongü rongnung tasembuba liasü. Pa 1957 küm October ita nung Malaysia-i aru aser küm 50 dak tema Malaysia nung Tsüngrem tenzüka aruogo.

Pa mezüng Kaula Lumpur nung aliba St. John Arogo nung

inyak. Mission mapa nung yaritsü atema pai küm ka English oshi course agia liasü aser India nung küm ana Tamil oshi course agia liasü. Paisa Indonesia nung ita asem Bahasa oshi course agi.

Malaysia nungsa pa Church of the Visitation, Seremban nung 1967 küm nungi 1977 tashi inyaker Church of St. John Vianney, Tampin nunga 1977 nungi 1987 tashi inyaker.

Iba sülen pai Arogo aika nung menden balala nung tenzüka aru.

Paisa National Union of Plantation Workers den senteper rubber lu nung inyaker aika yari aser pai nija organization ka tenzüka nisung aika nem mapa agütsü aser factory nung inyaker chirnurtem nem shisaliok tajung agütsütsü atema inyaka aruogo.

1987-97 kümtem nung pai Kaula Lumpur nung aliba Pastoral center nung inyaker. Pa pastor inyakra den nübur tenzüka arudang Seremban aser Tampin na nung jangratatemba tenzüka aruogo, ta pai tamalen metetdakja liasü.

Bretaudeau mapa nungi anisüngzükbä sülen-a pai Malaysia nung pastoral ministry nung kanga yakyaka inyaka aruogo aser tatemsa 2014 küm June 14 nü France-i meyipa oa liasü.

# ANO GO ABEN TSÜNGREM DEN

## Jungtepshia liang

Tenladak madak ne tenla tokjang aser oang, aser tamasa ne adianu den jungtepang, ajiser arung aser ne tenla agüjang. Mathi 5:23,24.

Ne adianutem den tsükchitepa yur tenla agütsübaji tagizüktettsü tenla masü. Yisui Pa sülen anidakertem dang kar anema langka ta lira parnok den jungtepang ta ashi. Alima telemtetba ka yur jungteptsü bushir Khristantemi kechi südir süaka jungteptsüla.

Nenoki ashir, "Saka nenoki ashir pai ni koda yirutsü nai memetet! Onok tesendaktep jungshiteptsü kuli maka." Mesüra, "Ni merangogo saka lai au masü." Jungtepba alitsü asoshi Yisui talila o meinoki. Ne tsükchir dang meimang ta dang Yisui ashi (Matt. 5:44). Pai na rishikangshira pa dang meimang. Pa atema sarasademjang ta dang ashi (Matt. 44). Yimjak nung na mak südaktsüra nai meyipa telanzü (t. 39). Kari ne dang langka meshira talila agüjang (t.41). Alimai sayur "Na atema liang." Yisui sayu, "Ne sasa tila kümang."

Na ajemzüksütsü ta alimai tekümdangtsü agütsür. Yisui Pa nütsüngtem dang junga beshitsüla ta meblem saka parnoki ajak den jungtepa alitsü bilemstü. Nisungi pa dak metsü metsüloksü aser kangki nung angenlok. Pai kechi langzü aji asenok yimya (model) lir: "Oba, parnok dang tai tokang, kechiaser parnoki kechi inyaker aji parnoki memetet (Luke 23:34).

Idakji maneni ozüng raksaba lira aser tashi mangaba lira, ibaji jungteptsüla. "Ni mapatem shidak inyaksü meranger, saka kü tsükchirtemi magizüker" ta asen sasa bilema asenoki tiplama alir. Tsüngrem Oi "Jungtepba alitsü merangang" ta mashir saka, "Jungtepang" ta ashir. Kar den na yimjung nüngdaka lir asü? Süra Tsüngrem ashiba ama inyakang.

# Barnabas Fund teloki Afghan nunger Khristan 400 yaria jendaktsü

**September 03, 2021:** ozüng benokba nung sepaitemi Khristan charity telok- yaria liasü, ta pai ashi.

Barnabas Fund-i alima tesem Barnabas Fund International balala nung reshikangshi tia Director, Patrick Sookhdeo-i nung aliba Khristantem yaria shidi ka ajanga UK nung MP arudar, aser tawa parnoki tem dang, Sharia ozüng ajanga Afghanistan nungi Khristan Khristantem kanga timtemtsü, 400 ajenba nung yariogo. ta metetdaksü.

Parnokisa linük nung Patrick-i 2010 küm Afghan Khristan 400 dak tema Kandahar nung ISAF atema tang teyaridak aser parnoki cultural advisor inyaka liasü.

maneni Khristan 1,200 "Tang Taliban yimsüsüba Afghanistan nungi jendaktsütsü kübok parnoki Khristantem, atema inyakdar. tetsürtem aser tanurtem kecha

Barnabas Fund Patron aser marendaki tepsettsü, kechiyong taoba mapang Canterbury nung parnoki Sharia ozüng kübok tongti putir inyaksang, Lord yimsüsütsü ta shiogo. Taliban- Carey-i iba osang ya i minorities kümzüksü ta metetdakja liasü. ashiba tetezü, Shia Muslims

Tang Afghanistan nung akhidang Khristan 5,000 nungi 8,000 shi denominations nungi aruba atsüka lir, ta pai metetdaksü. Khristantem lir. Iba tetezü

Barnabas fund telokisa Islam yimsü toktsür Khristan anüolen aliba linüktem dang yimsü agizükertembo masü. Afghan refugees agizükba Islam yimsü toktsür Khristan nung Khristantema züngokang, yimsü agizükertemji ta mepishiogo. mamangertem aser Islam linük

Tang Afghan nunger ashioktsürtem ta parnoki Khristantem timtemba ya züngshir, aser parnokji tasüba anüolen aliba linüktem sorkar temerenshi angutsü temsüa lir," tai ajanga lir, kechiyong Sharia ta pai metetdaksü.

**OLONG PAITEP # 5926**

	1		2			3		4		5
6								7		
					8		9			
			10							
11										
13		14		15						16
17								18		

- |                              |       |                              |       |
|------------------------------|-------|------------------------------|-------|
| <b>TIPIEN</b>                |       | <b>LANGTSÜNGLEN</b>          |       |
| 1. Inyaker ajangtetba        | - (3) | 1. Meshidak                  | - (3) |
| 3. Bangsemo adokdak          | - (5) | 2. Tanaben soshir            | - (7) |
| 6. Shitak mesüi inyak        | - (7) | 3. Iba anogo                 | - (4) |
| 7. Ya mimong nung angur      | - (3) | 4. Meshi                     | - (3) |
| 9. Reprangzük                | - (4) | 5. Yagi mi tsükloker         | - (9) |
| 10. Tasola                   | - (5) | 6. Shi tapu ka               | - (9) |
| 11. S _ _ _ _                | - (4) | 8. Yagi ayimer saka ozü masü | - (3) |
| 13. Yagi ajak ashioksür      | - (3) | 9. Ajokba shiruru ka         | - (7) |
| 15. Ki aokba oset            | - (7) | 12. Inyaktet                 | - (4) |
| 17. Ak shi nung inokba tasen | - (5) | 14. _ _ _ hi                 | - (3) |
| 18. Ishika                   | - (3) | 16. Akümüli nungi pilar      | - (3) |

**OLONG PAITEP # 5925 TELANGZÜBA**

- |                                       |                                      |
|---------------------------------------|--------------------------------------|
| <b>TIPIEN :</b>                       | <b>LANGTSÜNGLEN :</b>                |
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kiochtsü, |
| 9. Kin, 10. Teti, 12. Süir, 13. Jen,  | 5. Lenti, 7. Tajangzük, 11. teronem, |
| 14. Ola, 16. Talak, 17. Mazük.        | 12. Sempa, 13. Jahaz.                |

**Noksa nung meputepi aliba 10 bushiang**



**TANÜBO NAI LANGZÜANG**

Q. Koba küm BIMSTEC nung Bhutan aden ?  
 A. 2002      B. 2001      C. 2004      D. 2003  
 \_\_\_\_\_ (Taruba adok nung onoki langzüsü)  
**YASHIADOK TELANGZÜBA: Washington DC**

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Kurok**  
 (v) tarok küma yangluba ( bend to make deep and curve)  
 \* Warok kuroker auso yanglur.

**Kuset**  
 (v) shiruru po ama oset taret agi kua südaktsüba ( hit to kill by axe type object)  
 \* Anüklaï ak chanu ka kuset.

**NAI-A YA METETTER MA?**

Alima nung otsüsüsüsä nisungi mapa balala inyakba asenoki ngudanga mesüra angashir alitsü, saka mapang ka nung dang record balala yanglubabo aika inyakdanga mali. Ajisüaka, Tamil Nadu kübok Coimbatore district nungi Karunya Lakshmi-i record balala khen nung ajangzükttetta lir. Karunya Lakshmi ya Narasimhan aser Vasuki na jala lir aser Malumichampatti tesem nung la M.Com kaketshir ka aser Bharatanatyam o Silambam arts indang coach ka ama inyaker. Karunya-i Tamil folk aser martial arts tsütsü tejangrarba tulu aliba yong, Phoenix World Record Book nung World Record balaka ajangzükttettsü atema lai arts asempronlga - Bharatanatyam, Silambattam aser Karakattam meyokteper sayutsü lemtet. Bharatanatyam (Tamil Nadu) ya Indian classical dance; Silambam (South India) ya hadir amshiba Indian martial art tapu ka aser Karakattam ya Tamil Nadu indang sobaliba tsüingsang ka lir.



**SUDOKU # 5967      TELANGZÜBA # 5966**

5	1					8	3	6	8	9	1	3	5	2	4	7	
6		3		2				2	1	3	7	9	4	6	8	5	
			3		5		1	4	5	7	4	2	6	8	1	9	3
					8			5	7	4	8	9	5	1	3	2	6
9	3							6	9	3	5	6	7	2	8	1	4
			5					2	1	6	2	8	4	3	7	5	9
		8					3		4	2	6	3	8	9	5	7	1
			2	9					3	9	1	5	2	7	4	6	8
4		1	8	7					8	5	7	4	1	6	9	3	2

**OJANG LUTEP # 5512**

NGAATR	:	<input type="checkbox"/>							
NGMAKZÜODA	:	<input type="checkbox"/>							
MSTAAA	:	<input type="checkbox"/>							
EIP	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>				
ASSA	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>				
EIP	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>				
SSSATHIÜ	:	<input type="checkbox"/>							
JUANG	:	<input type="checkbox"/>							
OKSATZÜÜ	:	<input type="checkbox"/>							
EMRAANNGG	:	<input type="checkbox"/>							

**OJANG LUTEP TELANGZÜBA # 5511**

**ANGUBA AJAK PEI INDANG KÜMNÜA INYAKDANG  
 KÜLEM NÜBUR TAKOKSA AJURUR**

**TAN HOPTA ATEMA - KOMA SÜLA ?**

Q. Tang Nagaland nung parnoki meshiba ama, Mangkolemba, Tseminyu, Shamatore aser Tobu district tasen 4 akümtsü state government-i agizük nunga koma süla ?



Chikmagalur, September 03, 2021: Gari totzü aser LPG jenjang maneni atuba anema Hokolbarnü Chikmagalur nung Congress party nung inyakertemi Centre sorkar anema longkak aitba noksa nung angur.

### Kashmiri Muslim nunger atema ola adoktsü temeden lir: Taliban

**New Delhi/Kabul, September 03 (Agencies):** Taliban yimsüsüba kübok Afghanistan nunger litsüji India nung kiralongratsü atema amshitsüa akok, ta India-i arendakba mapang ka nung Taliban teloki, Kashmir densema alima tesem ajungalen Muslim nunger atema ola adoktsü parnok dak temeden lir, ta metetdaksüogo.

Ajsüaika Taliban-i linük shinga anema raraba hadir mamshitsü, ta parnoki metetdaksü.

Interview ka nung jembidang Taliban otongdar, Suhail Shaheen-i, "Onok Muslim nunger, anungji Kashmir, India aser linük mashie ka nung onoki Muslim nunger atema ola adoktsü atema onok dak temeden lir," ta metetdaksü.

"Onoki ola adoktsü aser Muslim nungerji ner nisung aser ner senso, ta onoki ashitsü. Nenok ozüngtem kübok parnok

nem-a kasa temeden agütsüsüla ta onoki ashitsü," ta Taliban lenirisa metetdaksü.

Taliban teloki Afghanistan yimtiba, Kabul agiba sülen anogo ishika tsüngda Taliban-i, Kashmir onük ya linük ana tsüngda teinyaktsü onük ka lir, ta jembia liasü saka tangbo parnoki Kashmir nung Muslim nunger atema ola adoktsü parnok dak temeden lir, ta ashir.

Brihostibarnü Ministry of External Affairs (MEA) otongdar, Arindam Bagchi-i, Afghan nunger litsüji kiralongra atema mamshitsüla, ta metetdakja liasü.

Yakünü Indian Ambassador to Qatar, Deepak Mittal aser Taliban lenir, Sher Mohammad Abbas Stanekzai na senden amenba mapang nung India-i Afghanistan dang nenok liji India nunger anema inyaktüsü mesüra kiralongratsü atema mamshitsüla, ta shia liasü.

India-i Afghanistan ya

Islamic kiralongra indang tiyongsü ka akümtsüa akok, ta bilemer. Tesüiba mapang ISIS aser Al Qaeda natia Afghanistan nung sorkar amenoktsü meranga liasü saka tamakok angu. Tang Taliban yimsüsüba kübok Sunni aser Wahabi kiralongrar teloktem iba linük nung jenoktsüa akok, ta aikati bilemer.

Tang Jammu & Kashmir nung security tensa tamajungba akümtsüa akok, ta bilema India-i iba region nung security ahangshitsü.

Sorkar osang ka ajanga ashiba agi, Pakistan nunger itdangitba agency ISI aser Taliban telok na tsüngda tesendaktep junga lir, anungji Pakistan-i Taliban teyari meshitsüa akok; ajsüaika tang Taliban telok ya tashi tait anungji ISI-i parnok memesüzüktetsü.

Tawa Pakistan nung Pakistan Tehreek-e-Insaf (PTI)-i aniba sorkari, India nungi

### Mapa manguba tebilemtsü ya Modi sorkar ajanga lir: Rahul Gandhi

**New Delhi, September 03 (Agencies):** India nung mapa manguba tebilemtsü tuluba akümba atema Centre sorkar aija Hokolbarnü Congress lenir, Rahul Gandhi-i, mapa manguba tebilemtsü ya Narendra Modi-i aniba sorkar ajanga lir, ta metetdaksü.

Twitter ajanga Rahul

Gandhi-i media osang ka lemsatapa Centre for Monitoring Indian Economy (CMIE) indang report ka metetdaksü.

Taküm August ita kija nung India nung nisung lakh 15 dak tema mapa makai aküm, ta CMIE report ajanga metetdaksüogo.

"Mapa atema Modi sorkar

ya lendong. Sorkari business mesüra mapa maangka majungkettsür mesüra menungiter saka mapa alirtem dang nungi mapa rakzüker," ta pai metetdaksü.

Linük rongsenkettsüng tamajungba akümba aser mapa makai akümba atema Congress-i tanen makai Centre sorkar aija arudar.

### India-Russia tesendaktep akhidang nungi junga lir: PM Modi

**New Delhi, Rongjui/September 03 (Agencies):** Hokolbarnü Ato kilonser, Narendra Modi-i, akhidang nungi India aser Russia linük na tsüngda tesendaktep junga lir; coronavirus wara mapang nunga vaccination programme densema wara dak sendakba onük balala nung linük anati yaritepogo, ta metetdaksü.

Eastern Economic Forum (EEF) senden nung jembidang Modi-i, linük ana tsüngda tesendaktep nung energy ya tongti tongshi ka lir aser India aser Russia nati longjemer alima nung energy market tashi

itdaksütettsü, ta metetdaksü. India nung sempet alir aser nendaka inyaker jenti lir aser Russia ket nung resource lir, ta shia Ato kilonseri, Russian Far East atema India nunger sempet amshitettsü, ta ashi.

2019 küm pai Russia kübok Vladivostok yimti semdanga EEF senden nung adenba sülen India-i "Act Far East policy" atema inyaktüsü sangdongba pai metetdakja liasü.

India aser Russia tesendaktep nung India atema Act Far East policy ya tongtibang shilem ka lir, ta Ato kilonserisa metetdaksü.

### India nung Covid tali puteter; Covid agi shiranger 336 asü

**New Delhi, September 03 (Agencies):** India nung ano nisung 45,352 dak coronavirus putetba sülen tang tashi nungbo linük nung nisung 3,29,03,289 dak iba tashidak putetogo.

Tesüiba ghonda 24 tsüngda iba tashidak agi teshirangdakpur 10,195 bendenlokogo; tang teshirangdakpur 3,99778 lir aser ibaji coronavirus caseload nungi shilem 1.22 lir, ta Hokolbarnü Union Health Ministry-i metetdaksü.

Tanü (Hokolbarü) densema tesüiba anogo asem tashi linük nung coronavirus tashidak timba-timba puteta arudar.

Tesüiba ghonda 24 tsüngda iba tashidak agi shiranger 366 asü aser India nung iba tashidak

agi asür ajak senteperbo 4,39,895 jungogo.

Tesüiba ghonda 24 tsüngda shiranger 34,791 anepogo, aser tang tashi nung coronavirus agi shiranger ajak senteper 3,20,63,616 anepogo.

Tang hopta shia coronavirus positive putetba shilem 2.66 lir aser anogo shia positive putetba shilem 2.72 kümogo.

Tang tashi nung samples crore 52.65 tendangogo, ta Hokolbarnü Indian Council of Medical Research (ICMR)-i metetdaksü.

Taküm India nung coronavirus vaccine agütsü tenzüka sülen tang tashi nung vaccine dose ajak senteper crore 67.09 agütsüogo.



September 03, 2021 nü Kolkata nung University balala nung azüngertemi Vice Chancellor of Visva-Bharati University, Bidhyut Chakraborty anema longkak aitba noksa nung angur.



September 03, 2021 nü Ranchi nung State Congress In-Charge, RPN Singh aser JPCC Tir, Rajesh Thakur nati osangbenertem den jembiba sentong nung Jharkhand Pradesh Congress Committee (JPCC) züngsemtemi longkak aitba noksa nung angur.

### Firozabad nung dengue agi nisung 50 asü; doctor asem anentsü

**Lucknow, September 03 (Agencies):** Uttar Pradesh kübok Firozabad yimti nung dengue tashidak agi shiranger 50 süogo aser asürtem rongnung 40 bo tanurtem lir.

Chief Medical Officer, Dinesh Kumar Premi-i, tang district nung camp 36 nung shiranger 3,719 treatment tagidak lir, ta metetdaksü.

Iba tashidak agi asürtem timba-timba akümba sülen District Magistrate, Chandra Vijay Singh-i chief development officer (CDO) dang shirangertem nem treatment agütsüsü aser tanga facilities ajak achaayangtsü tuyuogo.

Mapa nendaka meinyakba

atema Brihostibarnü District magistrate (DM)-i doctor asem mapa nungi anentsü aser tanungba sorkar doctor tem danga mapa nendaka inyaktüsüla, mesüra temerenshi tulu agütsüsü, ta metetdaksüogo.

Mapa nendaka meinyakba agi Primary Health Centre, Salai nung Dr Girish Srivastava, Dr Ruchi Srivastava aser public health expert, Dr Saurav nunger mapa nungi anentsü.

Bodhbarnüa Firozabad nunga Chief Medical Officer, Neeta Kulshrestha mapa nungi anenja liasü. BJP MLA, Manish Asija-ibo state nung iba tashidak agi nisung 61 süogo, ta metetdakja liasü.

## Bangladesh nung COVID-19 den Dengue agi khuret tali agütsü | Yoshihide Suga-i Japan PM menden yutsütsü



Dhaka, Bangladesh nung aliba Sir Salimullah Medical College Hospital nung dengue agi shirangertem tangokba noksa ka yangi angur. Taküm linük nung iba tashidak agi nisung 11,000 jungnua menep aser nisung 48 süogo, ta sorkari ashir, kong coronavirus tashidak den raraba mapang ka lir.

### Dhaka, Rongjui/Sept. 03 (Agencies):

Taküm Bangladesh nung dengue cases 11,000 jungnua jangjatetogo aser iba tashidak dak sendakba nung nisung 48 süogo, ta sorkari ashir aser ajaki coronavirus tashidak nung rangloker liaka ano danga tashidak maneni menatepa aoba sayur.

Tesüiba ghonda 24 tsüingda dengue cases 330 shi jangjateta January ita nungi tenzüka tang tashinung iba tashidak agi meneper nisung 10,981 jungogo, ta linük indang Directorate General of Health Services (DGHS) ajanga Brehostibarnü metetdaksü.

Kasa anogo merila nungi adokba tashidak yagi nisung asem asüba jangjaogo aser tang

tashinung iba tashidak agi astir nisung 48 alitsü, ta DGHS ajanga ashi.

Bangladesh nung dengue tashidak agi nisung mezüngbuba asüba ya July ita tetenzüklen liasü, aser kasa ita nisung 12 asü aser August ita nisung 30 asü, ta DGHS ajanga ashi. Tan ita nisung trok asü, ta parnoki ashi.

Sorkar indang data ajanga sayuba agi, linük yimtiba Dhaka kisüing nung dengue cases 10,053 shi lir, kong nütsüing yongsük million 20 jungnua lir.

Saka dengue agi shiranger ya sorkar indang data nungi timba alitsü, kechiaser nija meyong mozüki nung anepalurtem yangji maden, ta entomologist Kabirul Bashar-i ashi.

Aedes merila ajanga

prokshiba tashidak ya aziöktüsü asoshi sorkari maparen junga meinyaker, anungji cases ya tali akumtsü, ta pai ashi. Aedes merila ya tzüngluruwa mapang tzü atsüingdena alidak apoker.

2019 küm Bangladesh nung dengue tashidak pokteta nisung 80,000 dak tema menep aser nisung 67 asü.

Kasa mapang Bangladesh nung novel coronavirus tashidak ya hopta ana anogoshi cases 5,000 tera agi majung puteta arur, kong August ita nung anogoshi nisung 10,000 dak iba tashidak puteta liasü.

Taoba küm March ita iba tashidak wara pokteta sülen Bangladesh nung coronavirus yagi nisung million 1.5 menepogo aser nisung 26,362 süogo.

### Yoshihide Suga-i Japan PM menden yutsütsü

Tokyo, Rongjui/Sept. 03 (Agencies): Japan Ato Kilonser Yoshihide Suga-i tan ita party lenir atema election agishiba nung metokteptsü ta shiogo, anungji pa indang kümsük tatembang kati aruba sayur.

Küm ka tejakdang Shinzo Abe mapa nungi anenba sülen pa melena Suga ya shimteta liasü. Nüburtemi Suga dak temolung alemba asadanga jenjang tamajungtibai aluba mapang ka nung ajak aoksatsüsa iba osang ya sangdong.

Japan ya tang tashi state of emergency nung lir, aser ano tang COVID-19 wave tamajungtiba agi kongshia lir.

Iba linük nung tangbo coronavirus cases million 1.5 dak tema lir aser mozü agiba maparen temolung süa renloka maor.

Tashidak wara indang tensa tamajungba kumaka taküm Olympics Games ayongzüksü telemtetba agiba ajanga pa jenjang tamajungba akum.

"Tanü executive senden nung Suga-i coronavirus den raraba tongpang nung temolung agütsüner aser lenir atema election agiba nung shilem magitsü ta ashi," ta Suga'er Liberal Democratic Party (LDP) indang secretary general ajanga metetdaksü.

"Shidakba nunga ni süngmanga liasü. Ibai

asangsang nung tesasatsüka lir. Pai akok tashi tajungtiba inyakogo saka kanga junga bilemdangba sülen pai iba telemtetba ya agi," ta pai ashi.

Iba osang sangdongba sülen Japanese share temaba jenjangi atu, aser broad Topix stock index ya shilem 1.6 nung liasü, koba küm 30 nung tematiba jenjang alitsü.

Tang yimsü tesüdak telok nungi lenir asoshi tokteptsü lia aser küm tatemlen general election ka agitsü lia tashi taitba sorkar ka arutsü teimla nung Tokyo indang financial markets renlokogo.

Ruling LDP indang election ya September 29 nü agia iba party tir shimtsü. Iba election nung takok angur ya Japan indang lenir akumtsü imlar, kechiaser parliament nung LDP züingsem timba lir.

Arishi 72 tain Suga ya strawberry lu ayimer kibong ka nung aso aser Yokohama City Council nung mezüngbuba 1987 nung shimok aser 1996 küm pa ya Japan indang Diet ka ama shimteta liasü.

2005 küm Ato Kilonser Junichiro Koizumi-i pa ya internal affairs and communication indang senior vice minister shim.

Iba sülen Koizumi melensang Shinzo Abe-i pa minister mendeni ajungketa cabinet post asem agütsü, koba pai 2007 küm tashi inyaka liasü.

## Taliban co-founder Baradar-i Afghan sorkar tasenba anitsü

### Kabul, Rongjui/Sept. 03 (Agencies):

Taliban co-founder Mullah Baradar-i Afghanistan sorkar tasenba anitsü, koba yakta sangdongtsü lir, ta Islamist telok nungi osang ka Hokulbarnü sangdong, Iba telok ya tang Kabul north tsütsü Panjshir Valley nung parok anemer den raraba mapang lir.

Sorkar tasenba indang tongtipangtiba teinyaktsüji tzüngsarusa aser Afghan nung 240,000 shi tepsetba rara ajanga alenseter aliba rongsenketzüng kumzüksüba ya lir.

Baradar ya Taliban indang political office tekolakba lir aser pa den Taliban co-founder asür Mullah Omar'er jabaso Mullah Mohammad Yaqoob aser Sher Mohammad Abbas Stanekzai nung sorkar nung lenir asütsü, ta osang asem ajanga ashi.

"Lenirtem ajak Kabul tonga aruogo, kong sorkar tasen ka sangdongtsü asoshi renemshiba maparen tatemleni arur," ta Taliban ketdangsür kati pa tenüing memetdaksüi ashi.

Taliban indang tamangba yimsü tsütsü tematiba lenir, Haibatullah Akhonzada-i Islam indang tamendak dak telungzük nung tamangba yimsü inyakyim aser yimsüsüba nung rangloksü, ta ano Taliban osang ka ajanga ashi.

Taliban-i linük nung tesem timba amokbangba sülen August 15 nü Kabul yimti atsüingdoka liasü, saka Panjshir Valley nung parnok anema nokdaker lir, kong kanga sashia khateper aser nisung jenti süogo, ta osangtem ajanga ashir.

Region nung militia meyirijang aika den sorkar meyong armed forces nung anüingzüka alirtem iba lenden lima nung adenshia lir, kong taoba Mujahideen tanishir Ahmad Shah Massoud'er jabaso Ahmad Massoud lenisüba kübok lir.

Tangatetep kati arutsü jembishinüba nung tamakok ajuru amai ajiteter, kong telok anaprongi kati ka tenüing asener.

Ajaki molungba sorkar ka tentettsü tejangraba aliba indang Taliban-i jembia arur, saka osang ka ajanga ashiba agi, tang tentettsü aliba interim government yabo Taliban züingsem kisüing alitsü.

Iba sorkar nung ministry 25 alitsü, kong consultative council mesüra shura ka alitsü, kong Muslim nung tashi temeteter 12 alitsü, ta osang ajanga ashi.

Ano ita trok nungi ti tsüingta loya jirga mesüra grand assembly ka tentettsü sentong lir, kong teintet rogotem aser

Afghan nung loki tentet balala nungi teshimtet nübutem anidena constitution aser tarutsü sorkar indang jembitsü, ta osang ajanga ashi.

Osang ajungai interim government indang cabinet ya yakta shimtetsü imlaba ashi saka anogo mapang tsütsü meputeper, kong kari Hokulbar sa lemtettsü amai ashir aser kari taruba hopta tiyongtsü ka tashinung lemtettsü amai ashir.

Linük balala nungi tenla agütsür aser senotsü indoker matsüingdang sorkar tejangja ka nüingdaker. Humanitarian telok temi timtem tulu ajurutsü ashir aser küm aika bendanger sen dollar million sa million agütsüba nung metaloka aliba rongsenketzüng chireptsü, ta ashir.

Taliban-i linük mamokbangdang Afghan nung aika kibong mesütsü timtema liasü, kong tzüngsarusa liasü aser ano million aika yasatzüra tiai aitsü akok, ta teyari agütsüba tentet balalai ashir.

"August 15 sülen tensa tali tamajungba akumba asenoki angur aser rongsenketzüng laotsü tejangja sayur," ta World Food Programme in Afghanistan indang director Mary-Ellen McGroarty-i ashi.

Taliban-i Afghanistan agiba

sülen United States nung soita aliba Afghan indang hon, investments aser foreign currency billion aika US Tir Joe Biden indang administration-i salatsü tebilemba mali, ta ashir.

Taliban-i 1996 nungi 2001 tashi Afghanistan nung yimsü asüba mapang sharia mesüra Islamic law tesashi amshia liasü.

Saka tangbo parnoki alima dang item ozüingtem tera tesalaba sayutsü meranger, meimchir temeden wazüka ayutsü nangzük aser tejen tsükchirtem merenshiba nungi pila alitsü ashi.

Ajisüaka United States,

European Union aser danga linüktemi item tenangzükba nung tamang makar aser sorkar tasenba agitsütsü aser rongsenketzüng tsütsü teyari agütsütsü par mapa dak keta lir, ta ashir.

US sepaitem Afghanistan nungi ainshiba mapang tayimtsü amshia bendanger aser Afghan nungertem anizüker aodang anüingzüka aliba bendanger aser Afghan nungertem linük yutsür aotsü melatsü, ta Taliban-i nangzüka lir. Saka tang tashi Kabul airport shibanga lir aser aika alilen nungi jena aotsü meranger.



Philadelphia nung Hurricane Ida ajanga yipru mopung tesashi den tzünglu arudaksüba sülen September 2, 2021 nü yimtungtem tzü agi mubanger aliba noksa ka yangi angur. Hurricane Ida ajanga ajungben tzümetzüng adokdakja US kübok state pezü nung Brehostibarnü tashinung nisung 46 takum samaogo aser ki-o-jen raksaba den nisung million aika tammang tia nung lir.

## 'WebGIS Portal & Mobile Application' training ka ayongzük

**Tuensang, Rongjui/September 03, 2021 (TYO):** CKS Hall, Tuensang nung Nagaland Forest Management Project kübok Selection of Treatment Areas atema PRA Map Exercise aser Field Data bendentsü aser asadangshitsü atema Refresher Training on WebGIS Portal & Mobile Application nung anogo asem training agiogo, ta sangdong ajanga metetdaksü.

Iba training ya Chief Project Director cum CEO Dharmendra Prakash IFS (PCCF and HoFF)-i anir JICA (Japan International Corporation Agency) ajanga achaayanga liasü, koba forestry intervention aser biodiversity conservation project ka lir.

Meimchir taküm nung nungdaktatem ataloktsü/ajanzüktsü asoshi temelenshi adokdaksütsü aser iba den külemi Forest Community Development atema project balala nung rangloker inyaktüsü asoshi iba project nükjidong lir.

WebGIS portal aser Mobile application anaprongla Vedpal Singh IFS - Project Director (M&E and IM) tetuyuba kübok yanglur, koba ajanga mapang ka nung iba maparen mitta aser asadangshir.

PMU nung GIS aser MIS cell tekolak Samom Khelen Singh (DFO- Tuensang and DPD-M&E & GIS) iba training ayongzüktsü tasa angu.

Iba training tenzükba mezüng

anogo nung, DFO Tuensang, Samom Khelen Singh-i, 'PRA Map Exercise and GIS and Remote Sensing' dak sendakba nung pai asadangtetba tem telok dang lemsatepa liasü.

September 1 nungi 3, 2021 tashi Nagaland Forest Management Project kübok "PRA Map Exercise for Selection of Treatment Areas and Refresher Training on WebGIS Portal and Mobile Application for Monitoring and Collection of Field Data" omen nung ajemdaker iba training agiogo.

Singh-i, iba application jung junga angatetsü aser amshitsü asoshi training nung adener ground staff aser shilem agirtem ajungshia liasü.

Telemtetba agitsü asoshi yimdak-yimtsüng nung yimertem den longjemer inyaktetsü mechi ground-level staff tangatetba nung temelenshi adokdaksütsü atema Mobile App teyari agia forest dak sendakba data bendentsü aser tongtibangsa PRA Map Exercise ayongzüktsü nükjidong nung iba training agia liasü.

Ibaji ajanga WebGIS Portal teyari agia/amshia monitoring & evaluation dak sendakba timtem balala achaayangtsü asoshi külem sendaktepa alir tongtibangtem yarir.

Takotet asem, Anurag Verma, GIS Expert PMC NFMP, Limasanen Longkumer

aser Anamoa Imsong GIS team member PMU NFMP nungeri training mapang item application indang module balala metetpeladaksü aser item application amshiba yimyatem telok dang rasa ashi.

Brehostibarnü (02.09.2021) team-i Kuthur Village semdang aser module balala kübok plantation atema data bendenba, JFM aser SHG maparen aser Mobile App ajanga inyakyim akangshidaksütsü indang nung training ayongzükba liasü.

Iba training nung takotet asem (Anurag Verma, GIS Expert PMC NFMP, Limasanen Longkumer aser Anamoa Imsong GIS team member PMU NFMP) den DFO, Samom Khelen Singh nungeri PRA Map Exercise aser; WebGIS portal aser Mobile application indang module balala dak sendakba onük nung sensaksema liasü.

Iba sensaksem sentong nung Joint Forest Management Council indang chairman, vice-chairman aser secretary tem aruagi denogo.

Maneni, iba training nung onük balala atema tesayuba tasen agüja aser takok ngua ayongzükba atema shilem agir ajaki pelaba metetdaksü. Tuensang Division nung iba project kübok mapang balala achaayanga inyakba atema PMC Expert ajanga pelaba lemsatep, ta kasa sangdong nung shia lir.

## Kejanglwa & Jalukie nung Poshan Maah 2021 tenzüktsüogo

**Peren, Rongjui/September 03, 2021 (TYO):** Brehostibarnü (02.09.2021) Kejanglwa Village, Peren nung ADC Jalukie, K. Mhathung Tsanglao, NCS-i Poshan Maah 2021 tenzüktsüogo, ta sangdong ajanga metetdaksü.

Block CDPOs, DPRO Peren, AWWs, Village Councils, District Mission Management Unit, Block Mission Management Unit, NSRLM, RD Block Jalukie aser Peren nungi ketdangsürtem matsündang, Tsanglao-i iba sentong tenzükja liasü.

Department of Social Welfare kübok Peren ICDS Project ajanga iba sentong ayongzükba liasü.

Poshan Maah 2021 tenzükba sentong nung, K. Mhathung Tsanglao-i, süngdonglidong timba atemtsü aser iba tajangzük indang nung ajemdaker jembia, koba ajanga temang nung teyari agütsütsüsa süngdong balala dak mozü keta lir ta pai ashi.

Asenok achi-ajemba nung 'nutritional level' tajungba kümdaksütsü/tashiita yutsütsü

asoshi, asen meküta aliba tesem nung akok tashi mozü mamshii aonsotsü balala yoktsü/tsünütsü aser ana meta ali tazüng lira süngdong tem atemtsü asoshi pai telok ajungshia liasü.

Ita piyong agitsü asoshi tenzükba Poshan Maah 2021 sentong mapa küma takok ngua agitettsüsa, block balala nungi CDPOs aser staff ajak dang bendanga agüja inyaktüsü asoshi ADC-i mepishiogo.

Maneni, ADC Peren, K. Mhathung Tsanglao, NCS-i Poshan Maah 2021 tenzükja, Kejanglwa Village AWC nung neem sündong ka temoktsü. Iba sülen, ADC Jalukie, Dr. Tinojongshi Chang, NCS aser Dy. CMO Peren, Dr. Lanuakum Jamir napronglai süngdong ka ka temokja liasü.

Iba sentong nung District Poshan Coordinator Asst. Peren, Kukule menden liasü. DPO Peren, Asangla Jamir-i Poshan Maah indang nung ajemdaker telok den jembia, ta kasa sangdong nung shia lir.

**Jalukie :** Department of Social Welfare, Peren kübok ICDS Project ajanga Bodhbarnü (01.09.2021) Poshan Maah 2021 tenzükba sentong agiogo. Women Welfare Conference Hall, Jalukie Town nung "Converging towards a healthy walk through life" omen nung ajemdaker iba sentong agia liasü, ta sangdong ajanga metetdaksü.

Iba sentong nung, CDPO Jalukie, Namhuheing-i, Poshan Maah sentong agiba mapang tongtibang maparen achaayanga inyaktüsü indang nung jembia liasü.

Poshan Maah dak sendakba maparen balala takok ngua mapa küma aotsüsa AWWs aser AWHs dang tongti shilem agitsü asoshi pai ajungshiogo.

Iba sentong nung District Poshan Coordinator Asst., Mezilung Nchang menden liasü. AWW Jalukie town, Ilungba ajanga Poshan tenangzüktep azüng aser liasü aser Samziuram AWW's o AWH's longjemer ken ka aten. Supervisor Jalukie, Kalivi Zhimomi-i tepela anküp o jembia.

## Ao Senden 21 buba yimkong...

Aor lenir mali ta aikati jembir saka tanü asen tsürabur Dr. S.C Jamir taküm lir aser lenla balala nung lanurtem atudar, anungji, asenok kangabo mesenseni kati ka shisatsü agüja ajungshiteptsüla, ta paisa ayongzükba ashi. "Pei kisüng atema bilemba aser kati ka arishitepba yimya ya melenshitsuila aser akok tashi kati ka meimtepa alitsü

merangtsüla", ta paisa shisem. Tanü putu joko kuli balala ajanga yim toktsür jila bushia liteper, anungji, pei maitsü (identity) samatsü ana nung lir, maitsü wazüka ayutsü atemaji oshi ya tongtibang shilem ka lir, anungji, pei chirtem dang pei oshi angazükdaksütsü aser jembidaksütsü merangtsüla, ta paisa tayongzükba ka agütsü.

2021-2023 kümsük asoshi

tang mena alir Ao Senden mendenpurtem; Tir - Wb. Chubawati Longchar (Nokpu), Tatong Tir - Wb. I. Imkong (Chungtia), Tongti Zülur - Wb. Imtipokiyim (Khar) aser Repsem Zülur - Wb. Arentemjen Jamir (Akhoya), Senotsü Zülur - Wb. Maputemsa (Chuchuyimpang) aser Kimen - Wb. Aoshingang (Longsa) parnokji tanaben shimshiogo.

## IMLANG LONGKUMER TAMBO SEMCHIR, UNGMA

Dist: Mokokchung, Nagaland

### MOLUNGNEN O

Imlang Longkumer Tambo Semchir Ungma-i asen chir Wabong Imtiakum Longkumer, S/o. Mr. & Mrs. Toshipokba Longkumer, pai mezüngbuba jenjang Junior Account Assistant (JAA) exam, Directorate of Treasurer and Account, Government of Nagaland ajanga agiba nung tematiba jenjang nguteta naroküm tajung bener arutsüba asoshi tenüngsang agütsür.

Tarutsü nunga asen kin asoshi takok konang nüngsang tulu bener arutsütsü asoshi tajungtiba aser takokba nung inyaka otettsüsa anema aliba den arishi moajang ta asen kin-i pa asoshi sarasadema atar.

*Imlang Longkumer Tambo Semchir tenüng nung, Sd/-*

**Mr. Temsuzenba, Tatar  
Mr. Sutsungkaba, Tatar  
Mr. Kazutemjen, Tatar  
Mr. Chungponnukun, Tatar**

Office of the

## Asangma Watsü Telongjem

P.O Tuli - 798618, Dist. Mokokchung: Nagaland

### TENÜNGSANG AGÜTSÜR

Miss. Toshimongla Jamir, Lt. Er. Temsünba-er jala, shibai Indian School Certificate (ISC) class 12 (Arts) tatidang 2021 nung, Council for the Indian School Certificate Examination (CISCE) kübok Jubilee Memorial School Mokokchung nungi school topper 96.2 % marks nguteta takok tulu angu, la nem Asangma Watsü Telongjem ajanga konang nüngsang tulu agütsür. Tarutsü nung ne wadang ajak nung Tsüngremi tali moajangma.

Ano shisashirtem shirnokisa 2021 HSLC aser HSSLC tatidang nung takok tulu ngutetogo, nenok ajak dang kanga pelar aser tenüngsang agütsür. Tsüngremi nenok wadang nung maneni takok nung aniang ta sarasademtsür.

Sd/-

**Wt. T. Ayangla Jamir  
President**

Asangma Watsü Telongjem

Sd/-

**Wt. Lanuinla Lemtor  
Secretary**

Asangma Watsü Telongjem

## Tepela Tasoba Anogo

Tenüng : Akümer Lkr  
Küm : 2  
Tasoba anogo : September 4, 2019  
Talidak : Officers Hill Kohima

"Jabaso Akümer küm ana tashi Pa taochi ma nung len aniba asoshi Tsüngrem tenüng asanger, ano maneni arishi talang moajang ta sarasademtsür." Happy Birthday  
**Temeim Aba, Avü, Anaü aser kinungertem.**



## Taküm Nagaland Spelling Bee tetoktepba magitsü

**Kohima, Rongjui/September 03, 2021**

(TYO): Covid-19 wara dak sendakba nung timtem balala ajuruba ajanga, taküm küm 'Nagaland Spelling Bee Competition 2021' magitetter, ta sangdong ka ajanga Fountain Club president S. Kevi Hibo aser general secretary Eyozol Pucho nati metetdaksü.

Iba tetoktepba (Spelling Bee Competition), koba küm shia Fountain Club aser State Council for Educational Research and Training (SCERT) longjemer ayongzükba aru, iba sentong episode 8buba tashi agiogo. 2019 küm media partner ama Morung Express, Crystal Cable aser IT Partner ama

Ramietect den longjemer iba tetoktepba tesüsa agiogo.

Alima ajunga asüngba coronavirus wara tenokdangba ajanga 2020 küm iba sentong thitema liasü.

Fountain Club-i, tensa tajungba akümdang, iba tetoktepba agitsü, kechiyong tarutsü nung kaketshirtem angazükba maparen nung iba tetoktepba ya kanga dang tajangzük asütsü, ta metetdaksü.

Kaketshirtem dang maneni ojangtem (words) angazüktsü aser tetoktepba ka atema renemshir ama teti bushia aser angazüktsü asoshi Club-i ajungshiogo, kechiyong ojangtem meteta aliba ajanga tangazükba tsütsü nungitter, ta club-isa ashi.

## Dimapur nung Sep 16...

(Tapak 1 nungi...)

Nagaland sorkari (Home) Brihostibarnü September 16 tashi lockdown tenokdangbatem alitsü atsülangba osang metetdakja liasü.

"State sorkari September 3 nungi September 16 tashi maneni lockdown alitsü telemtetba agiogo" ta Principal Secretary

Department of School Education (DoSE) Nagaland-i offline teaching atema Class 9 aser 10 atema school lapoktsü molunga aliba shiogo, saka High Powered Committee (HPC)-i dang iba telemtetbaji agitsü.

## Paralympics medal ana angur India tsür rongnung Avani mezüng kümogo



**Tokyo, Rongui/September 03, 2021 (Agencies):** Tang asaya aliba Tokyo Paralympics - tetsür 10m air rifle standing (SH1) nung gold medal anguba sülen, Hokolbarnü tetsür 50m rifle 3 positions SH1 tetoktepba nung Avani Lekhara-i ano bronze medal nguogo.

Paralympics nung gold medal angur India tsür rongnung Lekhara mezüng liasü aser tang kasa asayamung nung medal ana angur India tsür rongnung la mezüng kümogo.

Iba tetoktepba last four tashi nung, arishi küm 19 tain Lekhara pezübuba nung liasü aser shot ka nung lai point 10.5 anguba ajanga tasembuba

jenjang ajangzüketet. Lekhara indang total score 445.9 liasü.

Kasa tetoktepba nung Ukraine tsür Iryna Schetnik, shibai Lekhara-i gold medal anguba tetoktepba nung meneptepa asaya, lai point 435.3 ngua jenjang pezübuba nung tembang.

China tsür Cuiping Zhang-i Paralympic record score 457.9 yanglua gold medal angur aser Germany tsür Natascha Hiltrop-i silver medal angutsü asoshi lai point 457.1 ngutet.

Tetsür 10m air rifle standing (SH1) tetoktepba final nung Lekhara jenjang trokbuba nung liasü. Qualification mapang, standing series nung lai junga

shilem agi aser kasa yimya nung lai asaya bronze medal ajangzüketet.

Lekhara-i tasembuba jenjang matongdang, la Schetnik tesülen ser asaya liasü.

Asayamung tetenzüklen, tetsür 10m air rifle nung, lai India atema mezüng gold medal takok angu. 10m air rifle nung lai point 249.6 angu, koba 2018 küm December ita Shchetnik-i yangluba record lai menepa asaya.

### \* PM Modi-i Avani nem tenüngsang agütsü \*

Tokyo Paralympics 50m Rifle 3 Position SH1 nung India tsür para-shooter Avani Lekhara-i bronze medal takok anguba sülen, Hokolbarnü Ato Kilonser Narendra Modi-i la nem tenüngsang agütsü.

"Tokyo #Paralympics nung India nung para athlete temi maneni tenüng tajung bener arudar. Avani Lekhara shilem tajung agiba ngua pelaseter," ta Twitter nung PM Narendra Modi-i lemsatetep.

"Bronze medal takok anguba asoshi pelar. Tarutsü nunga la wadang nung takok tajung lidakjang ta sarasademtsür," ta Modi-i lemsatetepa liasü.

"#Tokyo2020 Paralympics nung otsüsütsüsa Avani Lekhara-i gold medal den külemi 50m Rifle nung Bronze medal nguogo. Iba otsü teti jembitsü. La nem tenüngsang agütsür," ta Bindra-i ashi.

## Tokyo Paralympics: Praveen Kumar-i silver medal angu

**Tokyo, Rongui/September 03, 2021 (Agencies):** Hokolbarnü, Tokyo Paralympics - tebur High Jump tetoktepba nung, India nung Para high jumper Praveen Kumari-i silver medal ngua India atema medal 11buba bendenloksü. Olympic Stadium nung, Asian record ajangzüketettsüsa Praveen-i metre 2.07 shi alemtet aser

Great Britain nung Jonathan Broom-Edwards tesülen pa tanabuba jenjang nung tembang. Jonathan-i metre 2.10 shi alemteta liasü.

Nishad Kumar, Mariyappan Thangavelu aser Sharad Kumar Praveen nung sülen tang asaya aliba Tokyo Games men's high jump nung Praveen-i medal pezübuba angur asütsü.

Arishi küm 18 tain Praveen-i mezüng merangdanga mapang pai metre 1.83shi aser metre 1.88shi alemtet. Pai ano metre 1.97shi malemdang metre 1.93 shi alemteta liasü.

Praveen-i ano metre 2.01 alemtsü atema anaben merangdang aser iba sülen metre 2.04 shi alemtet. Pai metre 2.07 malemtet, saka Asain record yangluba den tanabuba jenjang ajangzüketet.

Broom-Edwards-i tanaben

merangdang metre 2.10 alemteta, koba Praveen-i asemben tashi nunga Praveen-i iba jenjang metongtet.

Games asayamung rongnung taküm Tokyo Paralympics nung India-i medal timtiba angur asütsü. 2016 Rio Games nung India Paralympics contingent-i medal pezü dang angu.

Taküm Paralympics Games nung, Shooter Avani Lekhara aser javelin asayar Sumit Antil nati gold medal angu. Table tennis asayar Bhavina Patel, javelin thrower Devendra Jhaharia, discus thrower Yogesh Kathuniya, aser high jumper Thangavellu aser Nishad nati silver medal anguba sülen, Praveen-i India indang silver medal trokbuba takok angur asütsü.

Kasa asayamung nung Javelin thrower Sundar Singh Gurjar, high jumper Sharad Kumar aser shooter Singhraj nungeri bronze medal kokogo.

### \* Ato Kilonser Modi-i Praveen nem tenüngsang agütsü \*

Hokolbarnü, Prime Minister Narendra Modi-i para-high jumper Praveen Kumar nem tenüngsang agütsü.

"#Paralympics nung Silver Medal takok anguba asoshi Praveen Kumar nem tenüngsang agütsür aser nüma-atanger. Iba medal ya meranga inyakba aser bendanga agüja inyakba indang kuli lir. Praveen nem tenüngsang agütsür. Tarutsü nunga pai takok angutsü sarasademtsür. #Praise4Para," Twitter ajanga PM Modi-i lemsatetep.

Praveen-i medal anguba atema India Tir Ram Nath Kovind-ia Praveen nem tenüngsang agütsüogo.

Olympics nung India indang mezüng individual gold medal angusang, Abhinav Bindra-i Praveen nem tenüngsang agütsüogo.

Paralympic Committee of India, president aser 2016 Rio Paralympics silver medal angur Deepa Malik-ia Praveen nem tenüngsang agütsü.

"Men's High Jump T64 nung India atema Praveen Kumar-i medal 11buba kokogo. Pai kanga junga shilem agiogo. Linük asoshi Praveen-i tenüng tajung bener arutsüogo! #Praise4Para @narendramodi @ianuragthakur @NisithPramanik," ta Twitter nung Deepa-i lemsatetep.

## Argentina-i goal 3-1 agi Venezuela kokogo

**Caracas, Rongui/September 03, 2021 (Agencies):** Brehostibarnü, Olimpico Stadium, Caracas kübok World Cup qualifying asayamung nung Argentina aser Venezuela na asaya liasü. South American World Cup qualifying nung maneni jenjang tanabuba nung alitsü asoshi Argentina-i goal 3-1 agi Venezuela tsükdaktsü.

Copa America asayamung takok angur telok Argentina-i World Cup qualification indang asaya tenetbuba nung Venezuela den asaya liasü aser defender Adrián Martínez-i asaya dak mapet yimya benshia Lionel Messi alangdaktsüba ajanga, minute 32 sülen Venezuela pur asayar 10 dang kümadok. Referee ajanga Adrian nem indang indanga red card agütsü.

Adrián asaya nungi tukadoker sülen, mezüng half tonger mapang talila apuloktsür asayaba mapang Lautaro Martínez-i Argentina atema mezüng goal idaktsü. Argentina pur goal 1-0 agi tejakdang ser mezüng half tembanga liasü.

Break sülen, box tatemlen nungi Joaquin Correa-i minute 71buba nung Argentina atema goal tanabuba idaktsü. Minute asem Angel Correa-i Argentina atema goal tasembuba idakja liasü.

Asaya atemtsü lia (mapang talila apuloktsür asayaba mapang - 90+4), asayamung ayonger telok Venezuela atema Yeferson Soteldo-i goal ka idaktsü.

"Tanü onoki mezüng half tashi janratema asayaogo aser parnok rongnung asayar ka (Adrián) tukadokba asayar 10 den onoki asayatsüsa aküm. Onoki goal

idaktsüba sülen, parnok (Venezuela) nem goal magütsütsü meranga asaya. Ibayongji onoki point asem ngutet," ta Martínez-i ashi.

Venezuela team-i World Cup atema khen danga quality mesüdang. Parnoki point pezü dang ngua lir aser asaya tenet sülen, team 10 round-robin tetoktepba nung par telok table punglanglen nung tembangtsü akok.

Taruba match nung, Argentina puri table temaba jenjang tongteta alir Brazil team den asayatsü. Argentina den masayadang Seleccion puri Chile den asayatsü aser Deobarnü Sao Paulo nung Brazil-i Argentina den asayatsü.

Argentina-i Venezuela makok asübo, points table nung Ecuador team-i parnok ajatetter alitsüba. Telok ana (Argentina aser Venezuela) masayadang, Ecuador-i goal 2-0 agi Paraguay tsükdaktsü.

Iba asaya nung, telok kati danga goal meinoktsüteti mezüng half tembangba sülen, tanabuba half atemtsü lia minute 88buba nung Felix Torres-i Ecuador atema mezüng goal inoktsü. Mapang talila apuloktsür asayaba mapang, ano Ecuador atema Michael Estrada-i goal tanabuba idakja liasü.

Tang South American World Cup qualifying table nung, Argentina pur point 15 ngua lir aser Ecuador-a point 12 nung tasembuba jenjang tongtetogo.

Taruba World Cup qualifying round nung, Ecuador aser Chile na asayatsü. Kasa mapang, Paraguay aser Colombia na asayatsü terenemba lir.

## Tokyo Paralympics: Harvinder Singh-i bronze medal angu

**Tokyo, Rongui/September 03, 2021 (Agencies):** Hokolbarnü, Tokyo Paralympics - men's individual recurve asayamung nung Harvinder Singh-i bronze medal takok anguba sülen, tang asaya aliba Paralympics Games nung India contingent atema medal 13 bendenloksü.

Tebur recurve Bronze medal playoff nung, Harvinder-i South Korea nung Kim Min Su madak 6-5 agi takok angu. Iba tetoktepba nung asayar anaprongla (Harvinder aser Kim) set pungo nung 5-5 ngua tembangba sülen, shoot-off nung Harvinder-i point 10 aser Kim-i point 8 angu.

Bronze play-off masayadang, semifinal nung arishi küm 30 tain Harvinder-i 4-6 agi America nung Kevin Mather makok.

Round of 32 nung, shoot-off ajanga Harvinder-i 6-5 agi Italy nung Stefano Travisani tsükdaktsü. Round of 16 nung Harvinder-i 6-5 agi Russian Olympic Committee indang Bato Tsydendorzhiev tsükdakja liasü.

Semifinal nung America nung Kevin den masayadang, quarter final nung Harvinder-i ayong ayonga 6-2 agi Germany nung Maik Szarszewski tsükdaktsü.

New Delhi, Rongui/September 03, 2021: New Delhi nung sentong ka agiba mapang Union Minister for Youth Affairs & Sports, Anurag Thakur aser MoS Nitish Pramanik den Tokyo Paralympics nung medal angur Devendra Jhaharia aser Sumit Antil külemi tangokba noksa ka yangi angur.

## BILEMDANGANG

"Putu yimya melenshiba ama inyakyim melenshiang."